

La seconde edizion di START CUP YOUNG 2012, la gare tra lis scuelis superiors de region promovude de Universitât di Udin e de Fondazione Crup. Premi: la iscrizion a gratis ae universitât. Domandis dentri dai 17 di Març

Ideis zovinis par salvâ l'ambient

Invistî sui zovins e su la lôr creativitat par cjatâ ideis inovativis che miôr l'ambient e il teritori. E je la sfide butade di Start Cup Young 2012, la gare tra scuelis secundariis di secont grât promovude de Universitât di Udin e de Fondazione Crup cul supuart de Provincie di Udin e de Regjon Fvj. La iniziative, rivade ae seconde edizion, e met chest an une smire particolâr, ma no esclusive, sui progjets leâts ae valorizazion dal patrimoni culturâl e ae difese dal ambient. La idee e je di invidâ i fantats a cjalâsi ator, immaginant cemût che al sarès l'ambient che ju cengle se al fos curât di plui e capî cemût fâ un progjet doprant l'imprest dal *business plan*.

«Intune societât simpri plui complesse – e sotlinee la retore de Universitât di Udin Cristiana Compagno – i zovins a an di imparâ a jessi atôrs e no spetatoris de lôr vite, impegnantsi a frontâ cun spirt inovatif lis problematichis de quotidianitât. Start Cup Young e je une palestre pal futûr che e vûl svinçinâ i students des scuelis superiors aes disciplinis universitariis. L'obietif al è stimolâ la creativitat, la iniziative e la inovazion partint dai fantats plui zovins par inviâ un percors di orientament ae sielte universitarie testât sul cjamp cul aiût dai dotorants di ricercje. In pali, pai vincidôrs, e je la iscrizion gratuite ae Universitât di Udin «une oportunitât concrete e impuartante a poie dal sfuarç e dai sacrificis che students e fameis a frontin investint intal studi».

Start Cup Young e smire a sensibilizâ i zovins ae autoimprenditorialitât cun riferiment aes sieltis professionâls, ma soledut tant che

impostazion mental cuotidiane. «Metisi in zûc, verificâ la realizzabilitât des propriis ideis, compenetrâsi cun imprescj cemût che il *business plan* – e evidenzie Manuela Croatto, responsabil des relaziions esternis dal Ateneu, ideadore e project manager dal progjet - al pues jessi une oportunitât preziose». La Regjon e à metût la iniziativa intal catalic dal orientament «cul risultât – e va indevant Croatto - che za dis scuelis des provincinis di Udin, Pordenon e Triest lu an selezionât. Un bon principi duncje par une iniziative che e je daûr a dismovi interès ancje al di fûr confins regionâi.»

Start Cup Young al nas de esperience di Start Cup Udin, il premi pe inovazion nassût intal 2003 e promovût de Universitât di Udin insiem cu la Fondazione Crup cul fin di stimolâ la inovazion e la ricercje, in strette sinergie cui atôrs dal teritori. «O crôt che Start Cup



Di man çampe, la retore Cristiana Compagno, il president de Fondazione Crup Lionello D'Agostini e Manuela Croatto, responsabil de relaziions esternis dal ateneu

Young e sedi une idee vincidore – al comente il president de Fondazione Crup Lionello D'Agostini - che la Fondazione e sosten cun convinzion e entusiasim tant che e à fat cul progjet originari Start Cup, ritignintlu un strument zovevul par incentivâ lis ideis gnovis e la ricercje, e ancje par dâ impuls ae esigence preminente di inovazion dal sisteme economic furlan».

«I zovins - al va indevant D'Agostini - a rapresentin une prioritât pal nestri Ent, che al destine une part impuartante dai siei interventi ae lôr cressite, formazion, orientament e preparazion culturâl. In chesta otiche si coloeche la fuarte colaborazion inviade cu la Universitât di Udin, ma ancje cun altris Ents cemût che lis Fieris - e je stade di pôc screade di Udin e Gurize Fieris la 6^a edizion di Young Future for You - inte cussience che soledut in chescj moments di dificolitât al sedi impuartante fâ sisteme.»

DI SAVÈ

Ae competizion a puedin partecipâ grups (massim 5 components) des classis cuartis e cuintis des scuelis superiors che a varan di presentâ une idee imprenditorial disvilupantle secont il scheme dal *business plan*. I fantats a saran metûts dongje pe part tecniche, o sedi il studi di fatibilitât dal proôot proponût, di dotorants de Universitât di Udin formâts di pueste e pe part redazionâl dal plan di imprese di esperts dal Ateneu. A saran organizâts percors formatifs, incuintris e contats ancje serai vie skype, par no interferi cul impegn scolastics curriculârs.

Un comitat scientific al valutarà i trê miôr *business plan*. Al grup classificât prin al larà un bonus pe iscrizion gratuite par un an ae Universitât di Udin (corispondent a 1.525 euros par ogni component), il secont classificât al otignarà un bonus par ae seconde rate di iscrizion (935 euros par ogni component) intant che il tierç grup classificât al varà un bonus par ae prime rate prime di iscrizion (590 euros par ogni component). I vincidôrs de edizion furlane a podaran concor cun di plui a une selezion nazional che si tignarà a Otubar intal ambit dal Festival de Sience di Gjenue.

Lis **DOMANDIS** di partecipazion a puedin jessi mandadis dentri di sabide ai 17 di Març a: startcup@uniud.it
Il **MODUL** di partecipazion si pues scjarialu dal sit www.uniud.it/ricercje/impresis/start-cup-young/informazion.
La **SCJADINCE** pe presentazion dal *business plan* e je fissade dentri dai 30 di Avril.